



Sesida dals

Communitgà il

Protocol nr.

31 d'avust 2021

1. da settember 2021

792/2021

Dumonda Tomaschett (Cuira)

concernent ils temps da spetga en connex cun il tractament psicologic e psichiatic d'uffants e da giuvenils

Resposta da la Regenza

L'augment considerabel d'annunzias respectivamain d'attribuziuns d'uffants e da giuvenils en la dimensiun da 20 fin 30 pertschient (cifras exactas en chaussa na datti betg) dapi l'erupziun da la pandemia dal coronavirus chaschunan grondas sfidas per la psichiatria d'uffants e da giuvenils dals Servetschs psichiatrics dal Grischun (SPGR), ma er per las persunas spezialisadas che lavuran independentamain en il sector da la psicologia, da la psicoterapia sco er da la psichiatria d'uffants e da giuvenils.

Il temp da spetga per tractaments ambulants è s'augmentà l'enviern passà – betg sco ultim pervia da l'augment dramatic dals dumbers da cas – da circa 6 fin 8 ad 8 fin 12 emnas. Cas d'urgenza, en spezial tals da la psichiatria d'uffants e da giuvenils dals SPGR, vegnan però envidads anc il medem di ad ina consultaziun. L'Associaziun grischuna da psicoterapia renviescha al fatg che d'ina vart s'augmenta la dumonda e da l'autra vart resta constant il dumber da persunas spezialisadas che lavuran independentamain en il sector da la psicologia, da la psicoterapia sco er da la psichiatria d'uffants e da giuvenils. Ina part da quellas terminescha l'activitad professiunala pervia da la vegliadetgna ed igl è en vista mo in dumber limità da successuras e successurs. Tenor l'Associaziun grischuna da psicoterapia èn las persunas spezialisadas che lavuran independentamain en il sector da la psicologia, da la psicoterapia sco er da la psichiatria d'uffants e da giuvenils savens sfurzadas – perquai ch'ellas n'han betg avunda capacitads – d'attribuir uffants e giuvenils a la psichiatria d'uffants e da giuvenils dals SPGR. Sco motiv per la mancanza da la generaziun giuvna da persunas spezialisadas che lavuran independentamain en il sector da la psicologia, da la psicoterapia sco er da la psichiatria d'uffants e da giuvenils vesa l'Associaziun grischuna da psicoterapia en spezial la tariffaziun da lur prestaziuns cleramain sut la media.

S'augmentà è er il temp da spetga per tractaments staziunars, dentant betg uschè ferm sco en il sector ambulants. Actualmain po el importar 1 emna fin 2 mais. El dependa er dal lieu dal tractament. Uffants e giuvenils che basegnan in tractament en in rom serrà, vegnan attribuids a la clinica Littenheid. Uffants e giuvenils che pon vegnir tractads sin ina staziun averta, pon da princip restar en il chantun: giuvenils a partir da 12 onns en la staziun da giuvenils dals SPGR, uffants fin 12 onns tut tenor la diagnosa en la clinica d'uffants da l'Ospital chantunal dal Grischun, nua ch'els vegnan assistids en moda consiliara da la psichiatria d'uffants e da giuvenils dals SPGR, uschiglio medemamain en la clinica Littenheid. Cas d'urgenza da giuvenils, quai vul dir cas, nua ch'igl exista ina periclitaziun da sasez u d'autras persunas,

vegnan tractads – sche pussaivel ord vista medicinala – en la staziun d'urgenza da la psichiatria da personas creschidas en il Waldhaus.

Il problem cun il temp da spetga en la psichiatria d'uffants e da giuvenils exista en tut la Svizra e betg pir dapi l'erupziun da la pandemia dal coronavirus, mabain è s'accentuà gia ils onns avant la pandemia. Tras la pandemia dal coronavirus vegn il problem ch'è enconuschent en ils circuls spezialisads tematisà pli savens en la publicitad.

Tar la dumonda 1: Temps da spetga èn da princip nauschs per il tractament da mal-sognas psichicas, perquai che la sintomatica progredescha savens uschia. Pli baud e pli svelt ch'il tractament ha lieu, e pli curt ch'il process da guariziun è e dapli success ch'el ha. Tut tenor l'indicaziun èn dentant differents temps da spetga giustifitgabels per in tractament terapeutich ambulant u staziunar. Las annunzias che entran vengnan zavradas correspudentamain d'expertas ed experts da la psichiatria d'uffants e da giuvenils tenor ils scenaris da partenza, che defineschan l'urgenza d'in tractament.

Tar la dumonda 2: Per reducir ils temps da spetga per giuvenils en il sector staziunar han ils SPGR decidì d'installar ina staziun serrada cun tschintg letgs per giuvenils en la chasa da persunal da la clinica Waldhaus, fin che l'edifizi nov da la clinica per psichiatria d'uffants e da giuvenils dals SPGR vegn avert (previsiblamain il segund quartal da l'onn 2025). Uschia po il tractament da cas d'urgenza da giuvenils vegnir separà spazialmain dal sector da personas creschidas. Sco ulteriura mesira per reducir ils temps da spetga per tractaments ambulants han ils SPGR adattà ils process a las relaziuns actualas. Tant sco giustifitgabel è la durada da terapias currentas vengnida reducida per pudair cumenzar tractaments da novs cas annunziads. Ultra da quai èn vengnidas stgaffidas mintgamai duas novas plazzas per psicologas e psicologs sco er per psichiatras e psichiaters d'uffants e da giuvenils.

Sco contribuziun per dumagnar la dumonda han las personas spezialisadas che lavuran independentamain en il sector da la psicologia, da la psicoterapia sco er da la psichiatria d'uffants e da giuvenils augmentà per part lur pensums da lavur.

L'onn current paga il chantun als SPGR ina contribuziun da 3,1 milliuns francs per prestaziuns d'utilitad publica, da quels èn 1,35 milliuns francs per la psichiatria d'uffants e da giuvenils. La Regenza è pronta d'examinar l'augment da questa contribuziun, sche quest import na bastass betg per cuvrir ils custs dals SPGR per las prestaziuns d'utilitad publica ch'èn necessarias en la psichiatria d'uffants e da giuvenils.

Tar la dumonda 3: Per ils temps da spetga actuals dastgassan esser responsablas essenzialmain las grevazzas psichicas dals uffants e dals giuvenils, che resultan da las restricziuns pervia da la pandemia dal coronavirus che dura anc vinavant. En quest connex na datti dentant anc nagins studis expressivs.



En num da la Regenza

Il president:

Il cancellier:

Dr. Mario Cavigelli

Daniel Spadin